

Bo Si ta Si?

Nos ta biba den un era di engaño. Esaki no ta nada nobo. Gañamentu a bira komún desde Satanas a introdusí mintira den hòfi di Eden. Ningun pèrsona por bisa ku e nunca a yega di saka mintira. Di bèrdat, por ta bisá di esun ku ta deklará ku e no sa gaña, ku sikiera el a kaba di saka su promé mintira.

Awendia, bèrdat ta asina skars ku tin ora bo'n sa ken pa kere! No ta straña nos mas ku e komersiante, abogado, eskritor, mekániko, dòkter, polítiko, gobernante, sientífiko, profesor, i asta pastor ta kulpabel di trose e bèrdat. Ta bisá ku nos komunidat ta fundá riba mintira, i si diripiente tur bèrdat a sali na kla, nos komunidat manera nos konos'é aktualmente lo desintegrá!

E hudiunan di era di Hesus a desaroyá un sistema interesante pa gaña. Nan a hasi promesa, i keda sin kumpli. Nan a hustifiká nan engaño dor di siña ku si un hende ta hasi un promesa i ta hura "por Dios" pa kumpli ku su promesa, anto e ta obligá di kumpli ku loke el a primintí. Ma si e ta evitá di hura "por Dios, e por keda sin kumpli ku su promesa.

Suponé ku Buchi ta debé Linchi fl. 75,-- i Linchi ke su sèn mañan. Si Buchi ta bisá Linchi, "Mi ta trese e sèn mañan," ta kasi sigur ku Linchi lo no haña su sèn mañan. Si Buchi ta hura por shelu ku e lo trese e sèn mañan, KISAS Linchi por hañ'é mañan! Ma si Buchi ta hura por Dios ku e ta tres'é mañan, Linchi por ta sigur ku e ta haña su sèn mañan! Segun e hudiunan, e ora ei si Buchi MESTER kumpli.

Hesus a kondená esaki: "Boso a tende ku a wòrdu bisá na e hendenan di promé aya: 'Lo bo no hura falsu, ma lo bo kumpli ku bo huramentunan na SEÑOR.' Ma Ami ta bisa boso: No hura di ningun manera, ni pa shelu, pasobra esei ta e trono di Dios, ni pa tera, pasobra esei ta e banki pa Su pianan, ni pa Herusalèm, pasobra esei ta e stat di e gran Rei. Ni pa bo kabes lo bo hura, pasobra ni un drachi di kabei bo no por hasi blanku ni pretu. Ma laga bo 'Sí ta sí, òf bo Nò ta nò' i tur loke ta mas ku esei, ta for di e malbado" (Mateo 5:33-37).

Afortunadamente e kustumber hudiu di huramente ta deskonosí na nos islanan. Ma nos konosé e kustumber di gaña i keda sin kumpli ku promesanan muchu bon!

Kisas un hende ta protestá "Ami si ta kumpli ku mi promesanan!" Bèrdat? Talbes e no sa kiko un promesa ta. Dikshonario ta definí un promesa komo "un akuerdo verbal òf por eskrito pa hasi òf laga di hasi algu." Den otro palabra, bo por hasi un promesa sin bisa "mi ta primintí." Kualké biaha ku bo ta palabra algu, bo ta hasi un promesa. Kòrda e palabranan di Hesus: "laga bo 'Sí ta sí, òf bo Nò ta nò.'"

Pues, si bo ta bisa un bisiaña ku bo ta manda respondi p'e tal i tal dia, esei ta un promesa. Kumpli ku e promesa. No bisa un konosí ku bo lo pasa na su kas...djis pa bula pipa. Bo a hasi un promesa. Kumpli! Ora bo ta bisa un kliente ku bo lo yam'é bèk pa dun'é sierto informashon, hasi loke bo a priminti. Asta ora bo ta bisa un mucha, "Bin tuma," bo a priminti di dun'é algo. No keda sin kumpli!

Hende por konfia bo palabranan? Bo sí ta sí, i bo nò ta nò? Bo ta hasi loke bo ta palabrá?

Pronto nos ta bai urna. Polítikonan ta hasi máksimo esfuerso pa haña nos voto. Ta un echu konosí ront mundu ku tin bes e polítiko ku ta hasi mas promesa. Tin bes, no ta interesá nan si nan por kumpli ku nan promesanan una bes den a gana. Asta tin e pensamentu ku—bòt bias—esun ku ta gaña mihó--ta esun ku lo bira e próksimo lider den gobièrno. Moralidat no ta konta, basta ku nan por gana elekshon.

Nos ta hasi un apelasion na tur politiko, di tur partido: Laga bo sí ta sí i bo nò ta nò. No hasi promesanan ku bo no por kumpli, i kumpli ku e promesanan ku bo ta hasi. Ta muchu mas mihó pa hasi poko promesa i kumpli ku nan tur, ku pa hasi hopi promesa i keda sin kumpli!

E spièrtamentu aki no ta apliká na polítikonan so. Ta bon pa nos tur paga bon tinu na loke Beibel ta bisa: "Kumpli ku loke bo ta primintí! Ta mihó pa no primintí, ku primintí i keda sin kumpli" (Eklestiastes 5:4-5). Sòru pa bo 'Sí ta sí, i bo nò ta nò.'